

# TEZĂUR LITURGIC

**4 IULIE**

# ACATISTUL SF. MUCENIȚE ANA DEMIDOVA DE LA MOSCOVA



**MOSCOVA, 2000**



# **Акафист святей страстотерпице Анне Демидовой, верной служительнице Царственных мучеников**

## **Кондак 1**

Избранней Царем Небесным от чреды  
служителей Царя земнаго, верность Христу и  
любовь к ближним смертию крестной  
запечатлевшей, теплой о нас моливиенице,  
благодарственная пеня приносим ти, святая  
дево- мученице Анно, ты же предстательством  
твоим от всяких бед нас свободи и наследники  
Царствия Божия нас соделай, да всерадостно  
зовем ти сице:

Радуйся, богоносная страстотерпице болярыне  
Анно, светом вечней любви Христовой нас  
озаряющая!

## **Икос 1**

Ангельским чином радость сотворила еси,  
всехвальная новомученице Анно, яко всем  
благочестивым и богоугодным житием твоим,  
служением Царю земному и страданием правды  
Христовой ради венец нетленный и благодать  
молитися за ны пред престолом Всемогущего и

Всеблагаго Господа господствующих стяжала еси. Сего ради и мы, благодаряще Творца Нашего, показавшего в тебе силу благодати Своея, с любовью вопием ти сице:

Радуйся, чистоту душевную от младых ногтей возлюбившая.

Радуйся, дом Духу Святому себе соделавшая.

Радуйся, Христу Распятому всепобедно последовавшая;

Радуйся, благоволение Отца Небеснаго стяжавшая;

Радуйся, Милосердие Триипостаснаго Бога Нашего к нам приклоняющая;

Радуйся, с Царицею Небесною у Престола Царя царей предстоящая;

Радуйся, с ангелы и всеми святыми заступлением своим нас приосеняющая;

Радуйся, ходатаице усердная, прибегающих к тебе не посрамляющая;

Радуйся, богоносная страстотерпице болярыне Анно, светом вечней любви Христовой нас озаряющая!

## **Кондак 2**

Видевше, яко в мире сем вся суете и тлению причастна, измлада Христа возлюбила еси, всечестная дево Анно, преподобною аммою Таисею во училище, иже досточудной обители Леушинской во всяком благочестии и делании

духовнем наставляема, к небесем взоры духа твоего обратила еси, всеславная целомудрия рачительнице. Темже от страстей душевных молитвами твоими свободи почитающих тя и поющих о тебе Богу: Аллилуиа.

## **Икос 2**

Разум свой просветив книжным учением, чтение Божественных писаний, наипаче же душеполезных повествований о житии угодников Божиих и людей именитых и благочестивых, зело возлюбила еси, премудрая Анно; преподаваемая же тебе о мире Божиим учения, силою действовавшая в тебе благодати, в духовный сот превращала еси, добрая точию держала еси. Мы же ныне таковую мудрость твою хваляще, взываем ти:

Радуйся, теплотою учения родительскаго, огонь любви к Господу в сердце твоём возгревшая.

Радуйся, живыя стремления юности от земных к небесным возведшая.

Радуйся, ветве Лозы Истинныя, Вертоград Христов измлада украшавшая.

Радуйся, путь правый в Царствие Небесное обретшая;

Радуйся, сим путем невозвратно шествовавшая;

Радуйся, разум свой в послушание веры предавшая;

Радуйся, сердцем своим единому Христу

служити вожделевшая;

Радуйся, во всю жизнь осенением Приснодевы в непорочном девстве сохранившая;

Радуйся, богоносная страстотерпице болярыне Анно, светом вечней любви Христовой нас озаряющая!

### **Кондак 3**

Силою благодати Божия укрепляемая, крестным путем евангельским в житии твоём шествовала еси, святая Анно Леушинская, на Пречистую Владычицу по Бозе все упование возлагая.

Темже и нас молитвами твоими от всех козней лукаваго укрепи, да непреткновенно возможем пройти путем заповедей Божиих и сподобимся Господеви выну воспевати: Аллилуиа.

### **Икос 3**

Имуще пред умными очима своима образ Христа Господа, усердная ученица и благая последовательница Спасителя Нашего в житии твоём явилася, яко вся стези твоя в

Евангельском благовестии полагала еси, благая Анно, милосердием к бедным любовь и уважение насельников града Череповца стяжала еси. Мы же о тебе путем Божиим чудящися, взываем ти: Радуйся, мудрая взыскательнице Христа, бисера вожделенного и драгаго;

Радуйся, люботрудная носительнице

Христова бремене, легкаго и благаго.  
Радуйся, тайно творити добродетели нас  
научающая;  
Радуйся, к благочестия подвигам и милосердию  
нас призывающая.  
Радуйся, мир Божий в сердца привносящая.  
Радуйся, миру дольнему путь горе указующая.  
Радуйся, к тебе прибегающих скорая  
помощнице.  
Радуйся, всех скорбящих благодатная  
утешительнице;  
Радуйся, богоносная страстотерпице болярыне  
Анно, светом вечней любви Христовой нас  
озаряющая!

#### **Кондак 4**

Буря страстей и треволнений житейских не  
возможе поколебати тя, преблаженная мати  
Анно, сице молим тя: научи благоискусно искати  
пристанище спасения твердое: темже сугубо  
возсия в души твоей нетленная лепота  
благодати, угодная Вседетелю Богу, Ему ты и в  
радости и в печали с надеждою на вечную  
победу Его воспевала еси: Аллилуиа.

#### **Икос 4**

Слышавше святая благоверная царица  
Александра глаголы преподобней и богоносней  
матери нашей Таисии о тебе, всечестная Анно,

благоволи взяти тя в чертози своя и к лику ближних служителей своих сопрчислити. Ты же волю Государыни, аки волю Господню восприяла еси и благою наставницею для младых царевен и верною наперсницею императрицы явилася еси. Мы же, сие ныне поминающе просим тя: утверди нас в любви к Богу и ближнему, да зовем ти:

Радуйся, учение Спасителя о блаженствах Евангельских житием своим исполнившая;  
Радуйся, чад наших в благочестии и радости возрастати научающая;  
Радуйся, нашу юность светом истины Христовой просвещающая;  
Радуйся, от тленного богатства и служения мамоне сердца наша отводящая;  
Радуйся, отчуждающей от Бога славы человеки искати нам возбраняющая;  
Радуйся, душевныя раны маловерия нашего елеем милосердия твоего умащающая;  
Радуйся, присногорящая лампадо, умы и сердца верных дивно озаряющая;  
Радуйся, образе целомудрия, ревновати о стяжании сея добродетели нас научающая;  
Радуйся, богоносная страстотерпице болярыне Анно, светом вечней любви Христовой нас озаряющая!

## **Кондак 5**

Боготечною звездою возсияла еси нам,  
богоблаженная Анно, в земной юдоли сей;  
внегда бо обуреватися нам волнами житейских  
попечений и направляти путь житейского  
шествия своего к тихому пристанищу, твоими  
молитвами избавляеми есмы от блуждения в  
суете сует и потопления среди волн житейского  
моря, воздвигаемаго зря напастей бурею; сего  
ради, славяще Господа, тобою благодееющего  
нам, вопием: Аллилуиа.

## **Икос 5**

Видя мысленныма очима Начальника веры и  
Совершителя Иисуса, всю себе принесла еси  
Богу жертву живую, чистую и угодную, егда  
людие богоуступныя воздвигоша брань против  
Всемогущего Бога Нашего и Помазанника Его, в  
дни дни убо потече, яко вода кровь мученик и  
страстотерпцев, за Христа и правду Его  
умерщвляемых. Мы же, ведующе тя, за Спаса  
Нашего купно с Государем пострадавшая,  
всеблаженная Анно, яко молитвенницу и  
покровительницу предивную дерзновение велие  
ко Христу имущую, с любовью тебе воспеваем  
ти сицевыя похвалы:

Радуйся, Царствие Божие внутрь себе  
восхитившая;

Радуйся, о Бозе Вседержителе поревновавшая;

Радуйся, вольная страдания за имя Его претерпевшая;  
Радуйся, нетленный и вечный венец мученический стяжавшая;  
Радуйся, в дому Отца Небеснаго обитель себе сотворившая;  
Радуйся, яко о спасении нашем присно ходатайствующая;  
Радуйся, твердость веры в час трудный проявити помогающая;  
Радуйся, от равнодушия и страха суетнаго сердца наша изцеляющая;  
Радуйся, богоносная страстотерпице болярыне Анно, светом вечней любви Христовой нас озаряющая!

### **Кондак 6**

Проповедует днесь Церковь Всероссийская небесную славу твою, благоверная болярыне Анно, ибо ты сугубый венец у Подвигоположника Иисуса стяжала еси, зане от дней детства твоего в житии добродетельном в обители Леушинской подвизалася еси, послеже во граде Петрове верно послужила еси Августейшему семейству, за правду Христову даже до крове от рук богборцев пострадала еси; ныне же во славе купно с Царственными страстотерпцы и всеми новомученики Российскими предстоиши престолу

Триипостаснаго Бога Нашего и молишися о всех о тебе со умилением поющих Господеви :  
Аллилуйя.

### **Икос 6**

Возсияла еси во всем земном житии твоём,  
богоблаженная мати Анно, светом благочестия,  
яко светило богосветлое, светоносными лучами  
подвига любви и добродетелей богоугодных  
просвещающе всех ближних твоих. Ныне у бо и  
мы к тебе с надеждою прибегаем и твоего  
молитвеннаго заступленна просим, яко во свете  
деяний твоих зрим верный путь ко спасению,  
помози нам недостойным в деланиих наших и в  
нашем прилежании ко Спасителю и Единому  
Искупителю душ наших, да славяще вопием ти:  
Радуйся, игу Христовой кротости рамо свое  
подклонившая;  
Радуйся, во след Распятаго Учителя  
последовавшая;  
Радуйся, Небесному Жениху красоту девства  
своего посвятившая;  
Радуйся, во всякой святыни, всеми делы Тому  
благоугодившая;  
Радуйся, мысль свою в Бозе утвердившая;  
Радуйся, милосердием твоим всех утешавшая;  
Радуйся, людем, в суете пребывающим, правду  
Божью открывающая;  
Радуйся, любити ближних своих с

самоотвержением научающая;  
Радуйся, богоносная страстотерпице боярыне  
Анно, светом вечней любви Христовой нас  
озаряющая!

### **Кондак 7**

Хотя змий лукавый искусити тя, якоже Иова  
многострадальнаго, воздвиже бурю злобы  
нечестивых, изгнавших тя в заточение. Обаче  
благодатию Всесвятаго Духа укрепляема, всякая  
злострадания и болезни добре претерпела еси,  
святая Анно, и мученическия кончины  
сподобилася еси. Ныне же пребывая в  
невечернем дни Царствия Христова, не престай  
молитися за ны у Престола Триипостаснаго Бога,  
да со умилением вопием: Аллилуиа.

### **Икос 7**

Дивную показуя любовь к Богу, ближняго своего  
паче себе возлюбила еси, ради заповеди  
Христовой, всеблаженная мати Анно, ничтоже  
предпочитавши паче любве Христовы,  
преходящи путь земный, по учению апостола, в  
Дусе Святе, в силе Божией, с оружием правды в  
деснице и шуйце. Того ради услыши от нас,  
тщасящихся подражати ти, с любовию возносимые  
похвалы сия:

Радуйся, благий образ служения Богу явившая;  
Радуйся, твоих трудов и подвигов плоды

вожделенная стяжавшая;  
Радуйся, достойно от Бога славу и величие, от нас же пение приемлющая.  
Радуйся, наша сердца огнем божественной ревности воспаляющая;  
Радуйся, бедные души наша на подвиг любви согревающая и укрепляющая;  
Радуйся, на всех путях жития нашего зреть Бога Вышнего нас наставляющая;  
Радуйся, растления душевного и совести лукавства нас избавляющая;  
Радуйся, утешение благое и радостное в сердца наша низпосылающая;  
Радуйся, богоносная страстотерпице боярыне Анно, светом вечной любви Христовой нас озаряющая!

### **Кондак 8**

Странное и непостижимое разумению человеков чудо днесь являеши нам, святая новомученице Анно Леушинская. С радостью воспоминаем, яко, в гонениях и теснотах сохранить возмогла еси помазание Святаго Духа, сие молим тя: испроси и нам животворную благодать Всеблагаго Утешителя, да сердцем воспоем Ему: Аллилуйя.

## Икос 8

Всем сердцем Богу предалася еси и всею душою  
Того возлюбила еси, святая мати наша Анно,  
верующе несомнено, яко ничто возможе  
отлучити тя от любви Небеснаго Жениха Твоего.  
Всею душою послужив Господу и всем житием  
благоугодив Ему, прославилася еси терпением  
твоим, взирая на начальника веры и  
совершителя Иисуса, за ним бо с царственными  
страстотерпцы купно последовала еси даже до  
смерти крестной, ведая убо яко Христос  
смертию своею смерть попра, и за него  
убиенныя вечно с Ним соцарствуют в обителях  
Отца Небеснаго. Мы же, торжество веры твоя  
ныне славословим и ублажаем тя, глаголюще:  
Радуйся, терпению Христову верно  
подражавшая.

Радуйся, силу заповеди Христовы, яже о любви  
ко врагом, премудре уразумевшая.

Радуйся, во искушении от людей богоборных  
хитрость лукаваго прозревшая.

Радуйся, яко горлица прекрасная, к Солнцу  
Правды воспарившая;

Радуйся, к Свету Невечернему из юдоли плача  
возтекшая;

Радуйся, наслаждающаяся духом мира, веселия  
и любви во Христе;

Радуйся, хладную любовь нашу согревающая и

преображающая.

Радуйся, огнем веры нас воспламеняющая и вдохновляющая;

Радуйся, богоносная страстотерпице болярыне Анно, светом вечной любви Христовой нас озаряющая!

### **Кондак 9**

Вси Ангели Божии возрадовашесе и Господа восхвалиша, даровавшего тебе таковое терпение, премудрая Анно, яко и во страданиях твоих не преставала еси хвалу и благодарение Богу приносить, ибо Бог прославляющих Его прославляет и, аки свечи, на свещнице Царствия Небеснаго поставляет, да бы яснее и мы зрели путь в долину вечной радости ведущий. Таковому Божию милосердию радуящесе, победную песнь Богу поем: Аллилуиа.

### **Икос 9**

Витии многовещанныя не возмогут изрещи, яже уготована Бог любящим Его, их же око не виде и ухо не слыша и яже на сердце человеку не въздоша. Ты же, всехвальная мати наша Анно, ныне наслаждаеши сих изобильно купно со мученики Царственными и слуги верными: врачом Евгением, Иоанном и Алексием. Сице молим тя: купно с пострадавшими с тобою

вознеси молитвы о спасении и благополучии  
нашем, да зовем ти:

Радуйся, богомудрых умов утешение;

Радуйся, боголюбивых душ увеселение.

Радуйся, исповеднице новая и преславная;

Радуйся, веры истинная ладия непотопляемая;

Радуйся, молитвеннице о нас пред Богом  
теплейшая;

Радуйся, в скорбех грядущих на ны, помощнице  
вернейшая;

Радуйся, во бранех со диаволом терпению нас  
научающая;

Радуйся, духом же нам соприисутствующая и  
молитвенно тя призывающая посещающая.

Радуйся, богоносная страстотерпице болярыне  
Анно, светом вечной любви Христовой нас  
озаряющая!

### **Кондак 10**

Спасение души твоея от Бога улучившая, святая  
мати наша Анно, в радость Господа вошла еси, и  
ныне, венцем нетленным увенчавшаяся, со  
Ангелы ликуеши, взирая на престол небесный  
Всецаря Творца, ликами огнезрачных  
серафимов и херувимов окруженный; Сие же  
убо ведующе, просим тя, небесная наставнице  
наша, научи и нас, призывающих тя в помощь к  
Богу с дерзновением взывать: Аллилуйя.

## Икос 10

Стена быв при жизни всем приходящим к тебе, такожде и по смерти ны не оставляеши твоим заступлением твоим, благоверная болярине Анно; духом ныне пребываеши в чертозех Отца Небеснаго, за всех с верою и любовию тебе молящихся тепле предстательствуеши и помощь неоскудную подаеши. Тебе бо, яко мощной заступнице о душах наших, благодарственно поем сицевая:

Радуйся, Пресвятая Владычицы и преподобней Таисии достойная избраннице;  
Радуйся, со Царственными мученики у Престола Божия неусыпная о нас, грешных, ходатаице;  
Радуйся, со святым праведным Иоанном Кронштадтским присная о нас печальнице;  
Радуйся, почитающих светлую память твою небесная покровительнице;  
Радуйся, благочестия и братолюбия хранительнице;  
Радуйся, в беде спасительныя руки подательнице.  
Радуйся, уничиженных и гонимых миром покровительнице;  
Радуйся, о молящихся тебе неусыпная пред Богом предстательнице;  
Радуйся, богоносная страстотерпице болярине

Анно, светом вечной любви Христовой нас озаряющая!

### **Кондак 11**

Пение молебное приносим ти, угоднице Божия, и с верою и любовью припадающе ко образу Твоему святому, молим тя всеусердно: молися за нас ко Господу Богу, да дух благочестия твоего, благости и милости не оскудевает и в нас немощных и грешных: да будем чада и твоя не по имени токмо, но делом и всем житием нашим, и сподобимся вкупе с тобою во блаженней вечности пети Богу: Аллилуиа.

### **Икос 11**

Светом трисолнечным, горе озаренная, святая мати Анно, озари наша души сиянием Божия благодати и настави ны верно исполняти заповеди Христа Бога: вемы бо, яко много может молитва твоя пред благостию Его, яко верной Невесты и всепобедной страстотерпецы, купно со мученики царственными предстоящей в радости престолу Его на небесех, и внемлющей молитве христиан, долу сущих, печалиями и заботами многообразными колеблемых, обаче с надеждою на предстательство твое взывающих ти сице:

Радуйся, лампадо небеснаго блистания;

Радуйся, горнило молитвеннаго въздыхания;

Радуйся, маслино, елей милостей Господних  
источающая;  
Радуйся, лозо, упованием обетований  
непреходящих напоющая;  
Радуйся, благодеяния многая верным  
источающая;  
Радуйся, милостию твоя вся чтущих тя  
покрывающая;  
Радуйся, в немощех сущих благодатная  
посетительнице;  
Радуйся, в напасти впавших скорая заступнице;  
Радуйся, богоносная страстотерпице болярыне  
Анно, светом вечней любви Христовой нас  
озаряющая!

### **Кондак 12**

Благодать и милость испроси нам у Христа  
Владыки нашего, благоверная мати Анно,  
окорми предстательством твоим, отжени от нас  
всякого врага и противника, научи подражати  
тебе, да избавльшеся искушений, прелести и  
бед, прославляем тя по достоянию, воспевая  
песнь благодарения Господу: Аллилуиа.

### **Икос 12**

Поюще песнь благодарения Всещедрому и  
Человеколюбцу Богу, прославльшему тя, яко  
добропобедную страстотерпицу Церкви Русския,  
величаем благочестивое житие твое во обители

Леушинской и граде Петрове, честное служение  
твое Августейшей семье, ублажаем болезни и  
труды твоя, имиже во славу Божию поработала  
еси, восхваляем подвиги и страдания твоя, яже  
за правду Христову претерпети сподобилася еси,  
и просим тя: истиннаго Бога познавати нас  
научи всех нас, в надежде на предстательство  
твое воспевающих ти сице:

Радуйся, свеще неугасимая, в молитве к Богу  
ярко пламенеющая;

Радуйся, фимиам молитвы твоея, яко кадило  
богоприятное, к небеси возносящая;

Радуйся, мир Божий в сердца привносящая.

Радуйся, пламень злобный струями любви твоея  
угашающая;

Радуйся, детям благопослушливым  
благословение подающая;

Радуйся, на труд духовный нас повизающая;

Радуйся, от сетей вражиих избавляющая;

Радуйся, бремя скорбей людских облегчающая;

Радуйся, богоносная страстотерпице болярыне  
Анно, светом вечней любви Христовой нас  
озаряющая!

### **Кондак 13**

О преславная угоднице Христова, всехвальная  
мати Анно, отрадо и утешение всех с верою к  
тебе прибегающих! Приими от нас,  
недостойных, сие малое похвальное пение с

любовию тебе приносимое, и теплым ходатайством твоим ко Господу испроси всем нам прощение прегрешений, наполни миром Христовым жизнь нашу, да сподобимся купно с тобою благодарственно Господеви во веки воспевати: Аллилуиа, Аллилуиа, Аллилуиа!

### **Молитва первая**

О избраннице и угоднице Христова, мати наша Анно, Церкви Русския украшение нетленное, земли нашея благое прозябение и красный плод, сродников твоих предстателю и наставниче! К тебе припадаем и молимся мы, смиреннии и грешнии, и, яко наставницу небесную, просим: всели в сердца наша любовь, еюже к Богу и ближним твоим при жизни земней преисполнена была еси, яко и душу твою положила еси, мученически пострадав за правду Христову купно со страстотерпцы Царственными. Научи нас, святая Анно, подражати тебе верно, Бога и ближних наших любить искренне и заповеди Господни совершати непогрешительно, да будем и мы с тобою чада Божия, не по имени токмо, но и самим делом и всем житием нашим. Призри благоутробно на всякую душу христианскую, милости и помощи от тебе ищущую. Буди всем нам в болезнях - целитель, в скорбех - утешитель, в печалех - избавитель, в бедах - помощник, в час смертный -

покровитель, да помощию молитв твоих святых сподобимся и мы грешнии спасение вечное получитьи и Царствие Небесное унаследовати. Ей, страстотерпице Христова, не посрами упования нашего, еже по Бозе и Пресвятей Богородице на тя крепко возлагаем, но яви нам многомогущное заступленине, да хвалим, славим и величаем человеколюбие дивнаго со святых Своих Бога, Отца и Сына и Святаго Духа, во веки веков. Аминь.

### **Молитва вторая**

О преславная мати Анно! Воззри милостивно на дом (приход) сей и люди, в нем живуция, и не отвержи требующих твоея помощи, не презри нас, молящихся тебе, но помози нам (имена) скорым предстательством твоим, да всяких бед, напастей и скорбей в сей жизни временней избежавше, кончину непостыдну обрящем, и тако на земли богоугодно поживше, жизни райския на небеси сподобимся, идеже вкупе с тобою прославим человеколюбие и щедроты в Троице славимаго Бога, Отца и Сына и Святаго Духа, во веки веков. Аминь.

### **Молитва третья**

О, святая новомученице Анно, призри с высот Небесных на нас, грешных и недостойных чад твоих и помози и нам достойно временное

житие прожити и скончати: отгони страсти мира сего лукаваго; да не отвратят нас от пути спасения ни козни вражие, ни прелести бесовские; направи стопы наши на стезю правой веры; буди нам поддержкой в бедах и напастях; подай терпение в скорбях и обстоятельствах; научи покаянию; любви к ближним; прощению - к обидящим. Ведуще убо ты и по смерти живыми сушу, припадаем к тебе и молимся: испроси у Господа Бога нашего, святая Анно, даровати нам все полезная для спасения душ наших; христианскую непостыдную кончину, да помощью твоею непреткновенно прейти воздушные мытарства и в день страшного пришествия Своего от шуия стояния избавить и вмеси с вами наследниками Небесного Царствия сотворить. Ему же подобает всякая слава, честь и поклонение со Безначальным Его Отцем и Святым Духом, ныне и присно и во веки веков. Аминь.



ПОЛНЫЙ  
**АКАФИСТНИК**  
КАНОНИЧЕСКИЙ

АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ

†

НОВОЕ  
\* НЕБО